

Headlines

- उपराज्यपाल मनोज सिन्हा होरें अज्ज कश्मीर च आतंकवाद दे शकार होए दे 39 लोकें दे आश्रितें गी नियुक्ति-पत्र सौपे।
- मुखमंत्री उमर अब्दुल्ला होरें अज्ज गुलमर्ग च दुनिया दे सब्बने शा उच्चे घुमकने आले इक रेस्टोरेंट ते कांफ्रेंस हॉल दा उदघाटन कीता।
- समूलचा राष्ट्र 2001 बरे च संसद पर होए दे आतंकी हमले दे शहीदें गी चेता करा रदा ऐ।
- मुखसचिव अटल डुल्लु होरें अज्ज जे.के. समाधान पोर्टल बारे इक समीक्षा बैठक लाई ते लोकें दियें शकैतें दा नबेडा करने च घट्टो-घट्ट समां लाने दे निर्देश दिते। मैहकमे आसेया हुने तगर 88 ज्हार शकैतें दा नबेडा करी दिता गया ऐ।
- भारती सेना नै पुंछ जिले च कब्जा रेखा कश 105 फीट उच्चे राष्ट्रीय झंडे दे आधार दा नींह पत्थर रक्खेया।



LG Appointment (Byte)

उपराज्यपाल मनोज सिन्हा होरें अज्ज श्रीनगर आले लोक भवन च कश्मीर थमां आतंकवाद दे शकार होए दे 39 लोकें दे नेडमें रिश्तेदारें गी नियुक्ति –पत्र सौपे। इस दौरान एल.जी होरें आतंकवाद थमां पीडित होए दे लोकें दे परोआर आलें गी न्याय- नौकरियां ते सम्मान देने दी अपनी वचनबद्धता गी फही पक्का कीता। एल.जी होरें आखेया जे अज्ज इनें परोआरें लेई न्याय दा लम्मा इंतजार खत्म होई गया ऐ। उनें अग्गे गलाया जे आतंकवाद ने छड़ा लोकें दी जान गै नेंई लेई ऐ-सगुंआ परोआरें गी बी तबाह कीता ऐ। उनें एह बी आखेया जे दफा 370 गी खत्म कीते जाने मगरा हून आतंकवाद दे शकार होए दे लोकें दे परोआर आलें हून बिजन कुसै हर-त्राह दे खुलियै सामने आवा रदे न ते आतंकवाद खलाफ अपनी वाज बुलंद करा रदे ना। इस मौके पर बोलदे होई उपराज्यपाल मनोज सिन्हा होरें आखेया



CM -Gulmarg Projects

मुखमंत्री उमर अब्दुल्ला होरें अज्ज गुलमर्ग च केंई विकास परियोजनाएं दा उदघाटन कीता ते इसी जनता गी समर्पित कीता। इनें परियोजनाएं दा मकसद सैलसफा सरबंधी ढांचे गी मजबूत करना ते मशहूर गुलमर्ग Resort च सैलानियें गी उपलब्ध करोआई जा रदी सहूलतें गी होर बेहतर बनाना ऐ। उदघाटन कीते गेदे मुख आकर्षणें च धुरी पर गै घुमकने आला दुनिया दा सब्बने शा उच्चा रेस्तरां बी शामिल ऐ- जेहदे च इक बड़ा हाल बी बनाया गया ऐ तां जे उत्थे बैठे दे लोकें गी कुदरती ते शैल-सनाखड़े नजारे दिक्खने गी लब्बी सकन। एदे इलावा मुखमंत्री होरें गुलमर्ग गोडोला आले रस्ते पर इक महत्वपूर्ण थाहर अफरात च इक घुमकने आले कांफ्रेंस हाल दा बी उदघाटन कीता ते कन्नै गै कोंगडोरी च एशिया दी सब्बने शा लम्मी स्की Drag लिफ्ट दा बी उदघाटन कीता। इनें ऐतिहासिक पैहलकदमियें कन्नै सैलसफा सरबंधी बुनियादी ढांचे च बड़ा मता बाहा होग ते अंतरराष्ट्रीय स्यालु खेडुं आहले गुलमर्ग दी पंछान गी आलमी स्तर पर लेई जाहगा।



Parl Attack Remembrance

समूचला राष्ट्र अज्ज संसद आतंकी हमले दे शहीदें गी श्रद्धांजलि अर्पित करा रदा ऐ। 13 दिसंबर 2001 गी अज्जै दे गै दिन सुरक्षाकर्मियें संसद दी राक्खी करदे होई सर्वोच्च बलिदान दित्ता हा। उपराष्ट्रपति ते राज्यसभा दे सभापति सी.पी. राधाकृष्णन, प्रधानमंत्री नरेन्द्र मोदी ते केंद्री मंत्री पीयूष गोयल, जितेंद्र सिंह, किरेन रिजिजू ते अर्जुन राम मेघवाल होरें

संसद भवन च शहीदें गी पुष्पांजलि अर्पित कीती। लोकसभा च विपक्ष दे नेता राहुल गांधी, कांग्रेस दिएं वरिष्ठ नेता सोनिया गांधी ते होरनें सांसदें बी शहीदें गी पुष्पांजलि अर्पित कीती।



Reasi Lok Adalat (2 Bytes)

अज्ज जिला अदालत रियासी दे अहाते च जिला न्यायिक सेवा प्राधिकरण रियासी दे सहयोग कन्नै राष्ट्रीय न्यायिक सेवा प्राधिकरण आसेया जारी कीते गेदे तय कार्यक्रम दे आधार पर चौथी राष्ट्रीय लोक अदालत दा सफलता कन्नै आयोजन कीता गया। इस मौके पर केंड्रियें बेंचें दा गठन कीता गेदा हा- जिनें मोटर हादसे च दावें- बैंकें दे भुगतान आले मामलें- बिजली-पानी दे बिल्लें पर तनाजें आले मामलें- ब्याह-शादियें दे तनाजें आले मामलें- समझौते आले परोआर आलें मामलें ते दुए दीवानी मामलें पर सुनवाई कीती।

पत्रकारें कन्नै गल्ल करदे होई जिला न्यायिक सेवा प्राधिकरण रियासी दे अध्यक्ष- खलील अहमद चौधरी होरें आखेया.....(बाईट)

इस प्रोग्राम दे मकसद गी उजागर करदे होई Legal Aid Defence Council दियें अध्यक्ष राशी बडू होरें दस्सेया(बाईट)



CS -Grievance Redressal

मुख्व सचिव अटल डुल्लु होरें लोकें दीयें शकैतें दा नबेडा करने सरबंधी JK समाधान पोर्टल दी इक ब्योरेवार समीक्षा बैठक दी अध्यक्षता कीती- जेहदे च मैहकमें-जिलें ते मुतलका दफतरें च शकैतें दे नबेडे सरबंधी कारकरदगी दा व्यापक जायजा लैता गया। मुख्व सचिव होरें इस मौके पर आखेया जे JK समाधान पोर्टल पारदर्शी नागरिक सेवां उपलब्ध करोआने लेई इक केन्द्री मंच दे तौरा पर उभरियै सामने आया ऐ। एदे इलावा उनें बैठक दौरान जवाबदेही गी होर सखल्ला बनाने- अपील तंत्र च सुधार करने ते CPGRAMS कन्नै तालमेल बधाने दी जरूरतै पर जोर दिता तां जे शकैतें दा नबेडा बे-रोक-टोक कीता जाई सकै। समीक्षा बैठक दौरान लोक-शकैतें सरबंधी विभाग नै जानकारी दिती जे इस मंच पर अजें तगर इक लख्व 2 जहार 110 शकैतां हासल होइयां न- जिंदे चा 88 जहार 91 दा नबेडा करी दिता गया ऐ- जेहदा कुल प्रतिशत 86 इशारिया 2-7 ऐ।



Poonch Highest Tricolor (Byte)

इक प्रभावशाली आयोजन च भारती सेना नै स्थानीय सरकारी अधिकारियें कन्नै रलियै पुंछ जिले च कब्जा रेखा कश बांडी चच्चियां अप्पर थाहर 105 फुट उच्चे राष्ट्रीय झंडे गी स्थापित करने लेई आधार दे निर्माण गितै नींह पत्थर रक्खेया। बन्ने आहले जिले पुंछ च एह सबबनें शा उच्चा राष्ट्रीय झंडा होग ते प्रांतै दे बसनीकें दे एक्के गौह ते देशप्रेम दा प्रतीक होग। 25मीं डिविजन दे GOC मेजर जनरल कौशिक मुखर्जी- विधायक हवेली- अजाज़ जान ते डी.सी. पुंछ- अशोक कुमार शर्मा होरें नींह पत्थर रखने मौके उत्थे मौजूद हे। आकाशवाणी खबरें कन्नै गल्ल करदे होई MLA अजाज़ जान होरें दस्सेया.....(बाईट)



Poonch Farmers (Byte)

सब्जियें दी रड गी लेइयै बधदी दिलचस्पी दे चलदे पुंछ दे करसानें दी औंदन च बाहा होआ रदा ऐ। बजार च मती मंग ते बेहतर कीमतें करी- प्रेरत होइयै केंई करसान रिवायती फसलें थमां बपारक रुप कन्नै सब्जियां राहने दी बक्खी रुख करी चुके दे न। मुकामी अधिकारी ते राई-बाई दे माहिर आधुनिक राई-बाई तरीकें- उच्च पैदावार देने आहली फसलें दियें

किस्में ते कुशल सिंचाई तकनीकें दे बारे च मार्ग-दर्शन देया करदे न- जेहदे कन्नै उत्पादकता गी बधाने च मदद थहोई ऐ। इस तब्दीली कन्नै नां छड़ा घरेलू आमदन बधा रदी ऐ- सगुआं मुकामी अर्थबवस्था गी बी मजबूती थहोआ रदी ऐ। करसानें मेद जाहर कीती जे लगातार समर्थन ते बजारें तगर बेहतर पुज्ज कन्नै इलाके च मुनाफे ते आजीविका दे मौके च होर सुधार होग। इस बारे बोलदे होई किश करसानें आखेया.....(बाईट)



Education Deptt. Ramban (Byte)

शिक्षा विभाग रामबन नै विद्यार्थियों गितै शिक्षा दा म्यार बधाने दे मकसद कन्नै STEM लेबोरेटरियों लेई इक समर्थ-निर्माण कार्यशाला दा आयोजन कीता। अटल टिकरिंग Labs दा मकसद SIATP तैहत शिक्षकें दे समर्थ दा विकास करना ऐ तां जे असरदार अमलावरी ते Mentorship गी यकीनी कीता जाई सकै। इक प्रोग्राम च इब्बी दस्सेया गया जे बच्चें गी सबक गी रटा मारने थमां रोकना चाहिदा ते व्यवहारिक तरीके नै पढाई करने लेई प्रेरित करना चाहिदा। इस मौके पर जिनें मुख्ब विशे पर चर्चा होई- उंदे च पढाने दे तरीकार- डिजिटल टूल्ज दा इस्तेमाल- लेसन प्लान बनाने ते नमीं शिक्षा नीति दे आधार पर पढाई गी तरजीह देना शामिल ऐ। इक कार्यशाला करोआने लेई योजना-त्यारी ते अमलावरी जनेह त्रंऊ मरहलें गी पूरा हुन्दा ऐ। होर जानकारी कन्नै DIET रामबन दे रिसोर्स पर्सन ते शिक्षक शाहनवाज़ गनी..... (बाईट)



Annual Day GGHSS Sarore

सरकारी हायर सकेन्द्री स्कूल सरोर नै कल अपना पैहला-पैहला सालाना दिवस मनाया। इस मौके पर विश्वाह हलके दे विधायक डाक्टर राजीव भगत मुक्त परौहने हे ते मुख्ब शिक्षा अधिकारी जम्मू श्री अजीत शर्मा होर विशिष्ट परौहने हे। सरोर दियें प्रिंसिपल मोहतरमा राबिया बातूल होरें सब्बनें मानजोग परौहने दा रस्मी तौर पर सोआगत कीता ते स्कूल रिपोर्ट पढी। उनें दस्सेया जे स्कूल पढाई ते खेडुं दे क्षेत्र च नित नमें आयाम तय करा रदा ऐ। इस मौके होरने दे इलावा DEPO जम्मू श्री बी.डी. शर्मा- ZEO विश्वाह- SHO विश्वाह- सरपंच- पंच- कलस्टर स्कूलें दे हैड- महंत हर्षवंदन ते स्कूली बच्चें दे माता-पिता मौजूद हे। इस मौके पर स्कूलै दे विद्यार्थियें इक बड़ा गै मन-मोहने आहला सांस्कृतिक प्रोग्राम पेश कीता। इस मौके बोलदे होई एम.एल.ए. विश्वाह डाक्टर राजीव भगत होरें ते सी.इ.ओ. जम्मू श्री अजीत शर्मा होरें स्कूलै दी बेहबूदी लेई हर बनकदा सहयोग देने दा वचन दिता। उनें स्कूलै दियें प्रिंसिपल- मोहतरमा राबिया बातूल हुंदी बेहतर कारकरदगी लेई उन्दी बड़ी मती सराहना कीती।

